



Gueten Oobe mitenand
 D Hooseglunggi sin bekannt
 Wos ebbis z feschte git – sin die Vier derby
 Mir sin sehr gärn do aane koo
 Oh lueg dr Beni isch au doo
 Sy erschte Göpp isch halt laider scho verby
 Vom alte Sagg zem Piccolo
 Alli sin do aane koo
 Bevor mir jetz dien musiziere
 Meecht y de Sieger gratuliere



Am 7.7.77
 Das finde mir vier no witzig
 Kunnt dä Bueb uff d Wält in Dornach Solothurn
 Mit 10 Joor goot är denn go schutte
 In Mingestai zu deene Pflutte
 Denn 3 Joor Arlesheim aber nid im Sturm
 7 Joor bym FC Basel
 2 by Frangfurt – und hetts gseeh
 Deerte aber schnäll begriffe
 Sy Haimat isch – dr FCB



Noh dämm beriemte Fuessballspiel
 Mit vyll Kampf doch ohni Stiel
 Verlange d Schwyzer fir Thyркеi e satti Stroof
 My schwarzi Katz macht do e Buggel
 Wo si das seet vom Beni Huggel
 Wien är druff loos goot im Dunnäll isch das nit doof
 Är darf nit an dr WM schutte
 Aber duets dehaime gniesse
 Hett au Glygg denn uss dämm Grund
 Muess är nid zum Penaltyschiesse



Die maischte Lyt vo do das waisch
 Kaufe bym Jenzer ihres Flaisch
 Und wenn si schmärze hänn geen si in d Abbideeg
 Bym Beni weiss me nid genau
 Goot är go boschte oder d Frau
 Duet im dr Gnoche weeh goot är zu sym Kolleeg
 Au s Filet bruucht är won är will
 Villicht no Chips und Gmiess derzue
 Das Flaisch legt är nid uff Grill
 Sondern in syni Fuessballschue



Langsam lauft er ab dr Zeller
 Bym Beni Huggel und em Streller
 Au dr Alex Frey isch nimm so telegeen
 Drumm hett jetz jede sy Event
 Ass me si denn au erkennt
 Wenn si speeter ohni Tricot vor uns steen
 Dr Beni-gääl-in St Galle (sait)
 Es duet mir sowiso nimm gfalle
 Si wärde – saagen alli Gaischter
 Ohni my au Schwitsermaischter



Sott är nai stimme jo stimme
 nai stimme jo stimme nai stimme
 jo stimme nai
 Sott är nai stimme jo stimme
 nai stimme jo stimme nai stimme
 jo stimme nai
 Sott är nai stimme jo stimme
 nai stimme jo
 stimmt är nai denn ischs e soo
 statt in dr Nati schutt y doo



Wenn duur Arlese duesch faahre
 Seesch all Daag e roote Kaare
 Zwische Pocoloco und em Fuessballfäld
 Dr Niggi wiene rote Blitz
 Muess go wässere wäg dr Hitz
 Esoo verdient dr Wirt vom Poco doch no Gäld
 Jetz nämt is wunder – was macht dr Beni
 Wenn är sy Schue an Nagel hängt
 My Vorschlag – Zoobe by de Senne
 Am Daag – dr Rase maihe hämmer dängt



S taussigscht Gool in unserer Nati
 Ych waiss nid ob das kaa glatt sy
 Bis die wüsse ob das zellt oder nid
 S scheenschte Gool hett är au gschosse
 Ou hänn mir das deerte gnosse
 Gääge Ziiri isch das gsy y finds e Hit
 Bym jasse heersch in fascht nie flueche
 Wie friehner by de Casino Rueche
 Dr Beni wär lut Chrigel Gross
 Als Profässer ganz famoos



Uffem Balkon im Casino
 Kaa dr Beni das nid sylo
 An dr Maischterfyyr gheerts zem guete Ton
 Är stellt alli Spieler vor
 Bis si do steehn wie im Chor
 Si singe s Maischterlied das isch denn ihre Lohn
 Nooh em singe kunnt dr Beni
 Ei du scheene Schnitzelbangg
 Är dichtet wie ne grosse Maischter
 Singts in Värsform – vyyle Dangg



Mir sin jetz fertig mite Värs
 Ebbis z dringge jo das wärs
 Y bi mir sicher duss isch alles scho parat
 Bim Ässe mien dr au nit spaare
 Mir geen moorn go Velo faare
 Und wenna no Flaisch gäb drzue statt nur Salaat
 Zem Schluss meeht ych no ebbis brichte
 Das sin alles woohri Gschichte
 Es hett is gfrait mir saage Dangg
 Dr Hoosglunggi – Schnitzelbangg



Am Beni Huggel 6 x Maischter
 Kläbdt dr Ball am Fuess wie Klaischter
 Är fiehrt im Mittelfäld bym FCB d Regie
 Sy Kolleeg dr Doppelmeter
 Kunnt zem Ball und denne speeter
 Hej dasch Foul – Schiri pfyff – är bricht yy
 Dr Marco sait y han e Zerrig
 Dr Beni due doch nid so sperrig
 Du bisch jo nur uss Hut und Gnoche
 Du kasch nüt zerrt ha – numme broch